

Chhuah Jan: Oct., 1984

APRIL, 2018

RAMTHAR



Easter Sunday Chibai!



SERMON

AIAWHSAKTU KRISTA...*phêk 5 - 6*

RAMTHAR ASSOCIATION CHANCHIN BU THLA KIP CHHUAK

EDITORIAL BOARD 2016 - 2018

| | | |
|---------------|---------------------------|----------------|
| Editor | : Rev. Thangzauva | 9612950043 (M) |
| Joint Editors | : Dr. Robert S. Halliday | 9862374232 (M) |
| | : Upa Zoramthanga | 9436362385 (M) |
| | : Pi C. Lalramparl | 9436190803 (M) |
| News Editor | : T Upa Lalbiakénga Fanal | 9436366234 (M) |
| Cir. Manager | : Pu Lalkawmnakima Hmar | 8575178109 (M) |
| Publisher | : Rev. K. Lalrinmawia | 9485140409 (M) |

[Office hun chhúngin biak ni thei se]**Member-te**

| | |
|------------------------|--------------------------------|
| Rev. F. Lalrinnunga | : Synod Moderator |
| Upa R. Dengzkipula | : Synod Secretary (Sr.) |
| Rev. B. Sangthanga | : Executive Secy., i/c Mission |
| Rev. Lalremruata Raite | : BEC Member |
| Upa H. Thangmawizuala | : BEC Member |

Thu chhuah tûr nei chuan Email - ramtharchanchinbu@gmail.com-ah emaw lehlahm chauhvah ziakin Editor emaw Cir. Manager, Ramthar Chanchin bu, Synod Office, Aizawl, Mizoram (India) hnênah emaw thawn tûr a ni e.

Ramthar Chanchinbua thu chhuah hi a ziaktu mawhphurhna a ni.

SYNOD MISSION BOARD HOTUTE:

| | | |
|-------------------------------|----------------------------|------------|
| Rev. B. Sangthanga | Executive Secretary | 9436372139 |
| Rev. K. Lalrinmawia | Secretary | 9485140409 |
| Dr. Robert S. Halliday | Coordinator | 9862374232 |

KUM KHAT LÂK MAN - ₹ 60/-**A CHHÛNGA THU AWMTE**

- | | |
|--|---------|
| 1. Editor thukhawchâng | - 1 |
| 2. Keimahni | - 2 |
| 3. Field Chanchin Thar | - 3-4 |
| 4. Sermon | - 5-6 |
| 5. BUHHMUN AṬANGIN: | - 7-18 |
| (1) Hetiang hi kan tawng thin | |
| (2) Tripura Gospel Team rawngbâwina (Part I) | |
| 6. Assam Mission Field hi | - 19-21 |
| 7. Karimganj-ah Krismas | - 22-25 |
| 8. Ramthar Chanchinbu man bih chianna | - 25-26 |
| 9. Ramthar Feh | - 27-32 |

THAWHLEHNA - KRISTIANNNA LUNGPHÙM

Isua Krista, thihna hneha a thawhleha chu Kristiante rinna lungphùm inngahna a ni. Thawhleha thu hi Kristiante tán Chanchin Ṭha, chanchin làwmawm, hnehna chanchin ṭha a ni a. Isua Krista *‘mitthi zing ata a thawhleha chuan Pathian Fapa a nihzia nasa takin a hriattír’* tiin Paula pawhin a sawi (Rom 1:1).

Lal Isuan a thawhleh tùr thu hi Kraws-a khenbeh a nih hma khân a sawi ṭhin a. Chu a thusawi chu a thleng dik tak tak ang tih hlauvin a phùmna thlân pawh sipaite vèntír a ni a. Mahse Pathian thil tum chu thlân leh sipaiten an dang zo lo. Sipaite chu hlauvin an khûr hial zâwk a ni.

Lal Isua a thawh leh meuh kha chuan Mari Magdalini leh zirtír dangte an phûr a, an inhrilh tawn a, an hlimin an lâwm êm êm a. Isua chu LALPA a ni tih hi Lal Isua zirtírte leh Kristiante tán chuan hnehna hlado a ni.

Thawhleha pawimawhzia sawiin Tirhkoh Paula chuan, *“Mitthi thawhleha rêng rêng a aum loh chuan Krista pawh kha kaihtawhin a aum lo vang. Krista kha kaihtawhin a aum loh chuan kan thuhiril hi eng mah lo a ni ang a, in rin pawh eng mah lo a ni bawk ang,”* a ti (1 Kor 15:14).

Hêng - Pathianni te, Thuthlung Thar lehkhabu te, chhandamna Chanchin Ṭha kan hril te, Kristianten LALPA chawimawina hla kan neih zawng zawngte hi thawhleha lungphùm chung a inngat vek a ni a. Krista thawhleha chuan thih hlauhna, thlân thim ṭihbaiawmna zawng zawng ringtute a hneh sak a, thlâna tâwp tûr kha vânah a hruai thleng a; lei pawh vânah a chantír a. Thuhiril ṭangkai leh thiltithe chu thawhleha lungphùm chung a inngat a ni zêl a ni.



KEIMAHNI

† TUARPUINA:

1) Pi Biakkungi (93), Aizawl Venglai, Nl. Lalropari, Evangelist, Jolabasa (Tripura Mission Field) nu chu ni 17.02.2018 khán *stroke* avàngin a thi.

2) Upa F. Zakhuma (77) New Vervek, Pi Jenny Laldinpuii, Staff Nurse, Gillakut (Odisha Mission Field) pa chu a leipui hàlnaah intikàng palhin, ni 22.02.2018 khán a thi.

3) Pi Lahlupuii (90), Tlungvel Venghlun, Pu C. Lalzawmliana, Director, MDTC, Bualpui (Home Mission North) nu chu ni 24.03.2018 khán Asthma avàngin a thi.

Synod Mission Board-in lusún chhúngte a tuarpui tak zet a ni.

† **RAMTHAR CAMPAIGN:** Presbytery hrang hrangah tuang takin Ramthar Campaign neih a ni, hetiangin:

Ni 10-11 March, 2018 chhúngin **Hmarthlang Presbytery, Vairengte Chhimveng Kohhranah** - Rev. Lalhmingthanga, Upa Vanlalngaia & Rev. Lalduhawma Ralte te an kal.

Ni 17-18 March, 2018 chhúngin **Sakawrhmutuai Presbytery, Lungdai Kohhranah** - Upa F. Lalfakzuala, Pu C. Kapthanga, Rev. P.B. Zosaphara & Pu Lalrinliana Colney; **Tlawng Presbytery, Lengpui Kohhranah** - Rev. J.H. Zaikima, Rev. J.H. Lalhruaizela & Pu Lallawmnakima Hmar te an kal bawk.

Ni 24-25 March, 2018 chhúngin **Tuichangral North Presbytery, Khawhai South Kohhranah** - T. Upa Lalbiakenga Fanai, Pu C. Kapthanga, Rev. P.B. Zosaphara & Pu Lalrinliana Colney; **Kolasib Presbytery, Kolasib Diakkawn Kohhranah** - Rev. R. Lalmingsanga, Rev. Remlalfaka & Pu Lallawmnakima Hmar; **Tuipuiral Presbytery, Khawbung Kohhranah** - Rev. H. Lalmuanchhana, Rev. Lalrintluanga & Upa Zairemmawia; **Serlui Presbytery, Kawnpui Kohhranah** - Upa F. Lalfakzuala, Pu C. Kapthanga & Rev. P.B. Zosaphara te an kal bawk.

† **ZIN:** Ni 12-16 March, 2018 chhúng khán Rev. T.C. Laltlanzova leh T. Upa Lalbiakenga Fanai te chu Home Mission South tlawhin an zin.

(Phêk 4-naah chhunzawm...)

www.mizoramynod.org

FIELD CHANCHIN THAR

CALCUTTA MISSION FIELD: Kum 2018 kan lo chuangkai a. Calcutta Mission Field hming pu mah se West Bengal-a district 12 tuam Chanchin Tha rawngbawlna Lalpan bul min tanpui leh ta. Kan lawm hle mai. Synod rorèl angin January 14 khan Serampore Bial hawn thar a ni a. Hei nen hian kan Field chhúngah Pastor Bial 7 a awm ve ta. Mission Board lamin Missionary thar mi 3 min rawn pe bawk a, anni nèn missionary mi 45 kan bung mék a. A ram mi *full-time* evangelist 59 leh *part-time* thawktu 80 lai ni mah ila indaihlohna a la nasa hle.

Kan thawh chhan ber ringthar pawh Lalpan min pe ve zêl a. January & February thla chhúng khân Baptisma chang thar mi 200 kan nei a ni. Hetianga zawi zawia lo pung zêlin tûnah hian Fellowship 76 leh Sub Centre kan tih mai, Fellowship-a la hlan kai chiah loh, 24 kan nei ve ta. Kan Fellowship thenkhatte (35 vèl) phei hi chu a member en chuan Church Court te ni ve ila chu, Kohhran pangngaia hlan kai ve theih mai tùr an ni ve ta. Mahse chhúng zingah chuan mahni puala Biak In nei (mi in luah ni lo) hi Fellowship 16 chauh an la ni si. Remchâng ni se, kan Fellowship tam tak hi Biak In nei thei sela chuan tûn ai hian an pun zâwk ngei pawh a rinawm a ni. *Seekers* kan tih mai, Chanchin Tha rawn ngaihvena, kan missionary-ten an kawm fâl mék hi mi 546 kan nei a. Tûna Kohhran member kan inchhiarnaah chuan mi 4,589 kan ni ve ta.

Hmanrua kan neihte hi an va tláwm si êm! Thawktuten naupangte hun-âwl chângin *Spoken English Class* leh *home tuition* an neihpui thin a, Non-Formal School kan tih hi hmun 25-ah kan kalpui mék. Adult Education Centre hi hmun 2-ah a kal ve mék a. Medical Centre hi Missionary Nurse pakhat leh a ram mi *doctor part-time*-a rawih mi 8 leh *medical attendant* eng emaw zât nèn centre 12-ah a khát mawi tâwkin *clinic* kan hawng thin. Missionary Craft Teacher 5-ten puan thui zirtúrin mi eng emaw zât an ho khâwm mék bawk a ni.

Hêngte hi Pathianin hmanruaah a hmang zêl a nih hi. Pastor Bial tinin thla tin deuh thawin a huhovin an feh chhuak (*Outreach*) òhin a. Chhùn lamah Bible Tract sem leh zàn lama *programme* hmanpui tura mite an sàwm a. Hmun khatah zai leh lăm nèn, *film show* nèn Pathian thu an hrilh òhin a. Hêngah hian mi tam takin Isua an lo hmehriat phah ve ta. Bial tinin thla tina *centre* hrang hranga *Seekers' Rally* kan neih òhin hi a seng khâwm run pui lai a ni fo. Seeker-ho nèn nilénga inkawmin, tlai lamah a duh apiang Baptisma chantír an ni òhin a. Tùm khata mi 30 chuang baptisma chantír pawh kan nei òhin.

Isua hnêna mi thar seng khâwm belh zêl tluk zeta hautak chu, kan lawi luh tawhte enkawl leh chàwm puitlin hi a ni. Kohhrana kalphung inzirtír leh an thlarau nun chàwm tura *programme* huaihawt lamah òtan kan la ve mék a. Bengali Bible School hi hêng atána hmanraw pawimawh tak a ni a. Kohhran hmeichhia leh òthalai páwl lo indin chho ve mék pawh hi member hnuh hnaihna leh chàwmna hmanraw pawimawh takah kan ngai a ni.

Kohhranhote òawngòaina Lalpan mal a sàwm a, rawngbâwnain hma a sàwn ve zêl tih a hmuna hmutu nih hi a vânehthlák hle a. Ringtharte anmahni kea ding tura kan inzirtír mék laiin an kutkawih ngei nghah chhuah hmaa bul òtanpui ngai an lo awm òhin a. Zoram Kohhranten òawngòaina nêna òtan min lákpuì zêl tûrin kan sàwm a che u.

Rev. J.C. Lalramliana, Field Secretary
Mobile: 94367 77218

Phêk 2-naa **KEIMAHNI** *chhunzawmna...*

Ni 6-14 March, 2018 chhúngin Rev. B. Sangthanga, Rev. T.C. Laltlanzova & Upa Zairemmawia te Field Committee neiin Delhi, Lucknow, Patna leh Jharkhand Field-ah te an zin.

Ni 19-28 March, 2018 chhúngin Rev. K. Lalrinmawia, Upa Thangmawizuala & Rev. K. Lalthangmawia te Field Committee neiin Nepal, Siliguri, Odisha & Calcutta Field-ah te an zin bawk.





SERMON AIAWHSAKTU KRISTA

*Rev. R. Lalthmingthanga
i/c Mission Veng Bial*

Ram dânah chuan aiawhsak ngaite chu mi tling zo lo, thiltihsak ngai an ni ñhin. Mihringte hian Pathian lam kawngah chuan aiawhsak ngai, mi tling zo lo kan nih kan hriat chian a ngai khawp mai.

He thua chian loh chuan piantharna thu-ah te, rinna kawnga ñhang lian zêl tùr te pawh hian buai a awl ñhin a ni. Chuvàngin, Isua Kristan keini mi sualte chhandam kan nih theihna tùra ai min awhsakna thu hi tawi têin kan sawi ve dawn a ni.

Engtin nge Isua Krista chuan kan ai a awh tih chu kan hre châk àwm e. Keini hi pianpui rênga Pathian anchhe dawng, chhandam ngai, boral tùr kan ni a. Pathian lama thiam kan channa tùr leh chhandam kan nih theihna tùrin amah ngei chu kan tân a inpe a; khenbehin a awm a, a thi ta a. Chu a thihna chuan mi sualte thihna tùr chu a la sawn ta a ni.

Lal Davidan, ‘*Ka bawhchhiatnate chu ka hre ta*

si a, ka sual hi ka hmaah a awm fo ñhin a ni’ (Sâm 51:3) a tih ang tiat thovin hun kal tawha kan thil sual tih te chuan min tibuai fo a, min tihrehawmin min tizak fo ñhin. Chûng thilte chuan thiam lo intihna leh beidawnnaah min hruai lût fo ñhin.

Pathian Thu erawh chuan – ‘Krista chu kan aia anchhe dawng lo niin, Dàn anchhe lak ata chuan min tlan chhuak ta’ (Gal 3:13) tiin min hrih a ni. Kan sualna avàngin ka aiawhin Kraws-ah Pathian lung ti-awi tùrin min lo tuarsak reng a lo ni.

Pathian thianghlimna leh felna dânah chuan chatuana boral tùr, Pathian hnên thleng zo tawh lo tùr kan ni ngei a; mahse, Pathian beràmno, khawvêl

sual kalpuitu Isua Krista chuan kan aiawhin thihna chu a lo thlang ta a ni. Sual man thihna chu Kraws-ah khán min lo pèksak ta a ni.

Pathian nèn inrem lehna nei tûr hian amah Pathian a lungawi theih chauh a ngai, kawng dang a awm lo. Bawhchhetu kha mihring kan nih tlat avàngin ran tam tak thisenin min tlan thei lo. Thisen thianghlim, sual kai thisen ni lo a ngai. Chu tlanna thisen atán chuan sual rêng rêng hre ve lo, Pathian Fapa Isua Krista thisen chauh chu a tling zo a ni.

Lal Isua chu Pathian leh mihring nih fâwmin khawvêlah a lo kal a. Pathian lungawina tûrin ama thisen chu kraws-ah chuan a rawn hlan ta a ni. Hla siamtuin,

“An sualna leh âtna te chu, Ka hre reng tawh lo vang; An tán ka Fapa a thi si,’
Lal Pathianin a ti.”

a lo ti rêng a ni.

‘Chu Isua chu kan sual avàngin mantirin a awm a, thiam kan channa tûrin kaihthawhin a awm bawk a,’ (Rom 4:25) tiin Pathian thuin min hrilh a ni. Pathian anchhe dawng tawh, a hmélma lo ni tawh mah ila, kan aiawhtu Kristaah chuan kan sualna chu a bel a, a thisen chuan kan sual zawng zawng min lo tlenfaisak ta a, min lâk bosak ta a ni.

Lal Isua Krista hi kan aiawhin a thi ni mai lovin, kan aiawhin a tho leh a ni. Kan aiawha Lal Isua thihna leh thawhlehna hi Bible chuan, *‘Pathian mi thlante chu tuin nge hék ang? Thiam chantirtu kha Pathian a ni si a. Tuin nge thiam loh chantír ang? Thia kha Krista Isua chu a ni si a; a ni, tho leh ta zâwka, Pathian ding lama awma min sawisaktu bawka kha a ni’* (Rom 8:33,34) tiin min hrilh

Lalpan a thu malsàwm rawh se.

Kan sàwmna ngai pawimawhin Rev. R. Lalhmingthangan Sermon thaj tak a rawn ziake thei a, a chungah kan lâwm hle - Editor

BUHHMUN AṬANGIN HETIANG HI KAN ṬAWNG ṬHIN

*Lalchhandami, Kewat Nizamat
Patna Mission Field*

Pathian hmanrua:

Pi Nirmala Devi fapa Sachin-a chu a damlo va. Lung lam ṭha lo a ni a, a natna an hriat sual avàngin hun rei tak TB (tuberculosis) damdawi hmangin an lo enkawl tawh a. Doctor damdawi chi hrang hrang pawh a ei hnem viau a; mahse, a dam chuang lo.

Khaw dang daiha an laina hnaiten thu mak tak an hrilh a: “Pathian Pakhat, Isua an tih ringtute ṭawngṭaina aṭangin damlo an dam thei,” tiin. Adharpur khua missionary-te awmnaah chuan lo kalin a fapa dam nân eng ang nge tih pawh a la hriat ngai loh Pathian hnêna ṭawngṭain tûrin, damna beiseiin a lo kal a. Missionary-in a lo ṭawngṭaisakna chu Pathianin a chhansak a. Sachin-a chu a dam ta daih mai a. An chàn loh khànah an duh an hmu ta a ni.

Chumi hnuah chuan Pi Nirmala-i chuan Isua chanchin chu a ngaihven ta hle mai a, “*Kan khuaah lo kal ula. In Isua chanchin hi*

min hrilh ula. Kan khaw mihote pawh rawn hrilh ve rawh u,” a ti a. Chu sâwmna chu bawhzuiin, chu khuaah chuan kalin, anmahni In ngeiah chuan inkhawmna bul chu ṭan a lo ni ta reng mai a.

A hnu thla thumah an nufa chuan Pathian tak tak be ve tawh tûrin an intiam a, Baptisma an chang ta a ni. Chutiang chuan ringtute chu an lo pun belh ve zêl a. Pathianin a ram din zêlin, tunah chuan *fellowship* ṭha tak din a ni ve ta a ni. Pathianin Thu chauh hmanga Thim leh Êng a siam ang khan, a kaa thu chhuak hian amah ring duhtute tan hian thilmak a la ti reng ṭhin a ni.

Miin Isua a rina, a lo pawm dân te hi thil chi hrang hrang hmangin a ni ðhin. Hei hi chu ringtu an nih dân kawng khat chauh a ni a. Hmanrua hi a ngah êm êm a ni.

A hmingah Ayush

Kan awmna hmuna mite hian hmeichhiate hi an la dah hniam hle mai a. Chhúngkuaah mipa an awm loh chuan engah mah an ngai lo a ni. Tu an neih pawhin tunu tam tak nei mahsela tupa an neih hma chuan an mô-te chuan hmuhsit an hlawh a, an dinhmun a hniam hle. An tiduhdah êm êm ðhin a. In hàl hlum, tuia zuangthla tih te an awm fo ðhin a.

Kan fellowship member Pi Bukly Devi fanu pawhin fanu 2 a nei tawh a. Fapa a la nei lo a ni. Pawna chhuah te an phalsak lo va, Ran ang maiin an chhawr a, a pasal pawhin a haw êm êm bawk a. A pasala chhúngte chuan an en hrangin an ten êm êm bawk a ni. Anchhia chi hrang hrang lawhin, an thlah kal zêl titawptu a ni tiin an an khum reng mai a ni.

A nu Pi Bukly Devi chuan Pathian a ring tlat a, kum thum chhúng a nghak a. Kan ðawngtaï ve tlah tlah bawk a. Pathiannah pawh regular takin a inkhawm a, Inkhawm banah ðawngtaïsakna an dawn hma chu a haw duh loh chang a tam mai.

Kum thum teh meuh a ngah ve hnuah, 2017 Kristmass ni takah khan tupa duhawm tak an nei ta a ni. Kan va kal leh chuan lâwm êm êmin, “*Pathian hi a lo awm tak tak a ni. Pathianin chhinchiannah, amah kan theihngihl tawh miah lohna tûrin ama pian ni takah kan tupa hi a piantir ve a ni. A hming pawh Ayush (Mizoin let ta ila Lalrinnunga kan ti àwm e. Rei tak Isua a lo rin tawhna, rinna nung rawn rah chhuah) kan sa a ni. Biak Inah mi hriatah ka sawi duh a, hun min pe rawh u aw. Miin Isua hi an rin ve ka duh a ni,*” a ti a.

A sawi laia a hlim hmél leh a phûr hmél te chuan ðah a tichhuak a, a hmuhnawm êm êm a ni.

Pathiannah Chairman din laiin, țantu pawh kan sâwm hmain, ‘Sawi tûr ka nei a ni,’ tiin, a țhutna ațangin maicham hmaah a lo kal a. Phûr takin, hnukulh țeuhvin a *testimony* a rawn sawi ve a ni.

Theih tâwpa kan hrilh leh kan zirtir ve pawh hriatthiam harsa ti leh sawi chhawn leh tûr hre lote an ni hlawm. Mahse an hnêna sawi tûr petu Pathian an rinna hi keini rawngbâwl-tute rinna ai mah hian a ngheta hriat chang ka nei fo mai.

Keini chuan kan thil tawn tam takte hi ngaiiah kan nei a, sawi chhuah kan châk ngai hek lo va, kan lâwm êm êm ngai bawk lo. Hmanni lawka Lal Isua rawn ringthar vete hi kan la awt ngawih ngawih zawk thei reng a lo ni. Engkim hi a malsâwmna leh thiltih theihna vâng a kan dawn a ni reng si a.

Chutiang chuan Pathian hian heng rawngbâwl-na tling lo tak tak te hi mal a lo sâwm ve țhin a. Țawng

thiam miah lova an inkawta kan țhutpui rikngawt thlahleh êm êm leh, kan hrethiam vek lo chung a an lâwmna leh harsatna an sawi ve bawrh bawrh țhin te hian keini hi min va tichak țhin êm!

Heti khawpa thawh tûr tamah hian hun ralmuang kan nei reng dawn si lo va, țhatchhiatna hman a awm lo va, damlo hman pawh hi kan ni lo a ni. Hrisel taka hna kan thawh theih nân leh mihring khawsak buaina leh harsatna tam takten kan kawng an dâl loh nân Kohhran țawng-țaina hi kan va mamawh nasa êm!

A lo kîr a, a awm ta reng a nih hi

Ringthar tlangval Kundan Kumar-a chu kan ringthar țhalai zingah chuan a duhawm ber niin ka hria. Pathian hi a ring a, a ngaihtuah lam apiang hi Isua nèn hian a sawi zawm țhin. A țhiante zingah chuan a khawsak harsa ber pâwl a ni a. An khawsak a harsat vâng leh an khuuah sikul a awm loh avàngin a

Ni-in khawpui lamah a naupan lai aṅgin a enkawl a.

Khawpuia awm ve ta chu rualawhna chi hrang hrang a nei ve ṅhin a. A nu leh pa te lah chu hnam mawl hun lai ang maiin, ni tin zan tin hian khawlaiah te inhauvin an au teng tung ṅhin a. Farnu pakhat leh nau mipa pakhat a nei a, an farnu pasal neihna tūr senso, thumchhawm tūr an neih loh avāngin nasa takin an rilru a hrehawm bawk a. Khawtlang lahin *'fanu nula pasal neihtir thei lo'* tiin an hmusit hle bawk. Unau zīngah a upa ber ve ta chu a nu leh pa pawhin an beiseina a lian ve khawp mai.

Chutih lai chuan an khuaah Field Worker pakhat hi Pathian thu hrilin a kal ṅhin a. Chutah chuan Isua chanchin hi a lo hre ve-in, kum khat hnu vël a ni awm e, Isua ringin a pawm ve ta a. Baptisma a chang ta bawk a. Pathian thu pawh a ngaihsak a, ṅawngṅai dân te a zir a, Bible hi a ngainain a zah êm êm ṅhin.

Isua a rin aṅgin amah enkawltu a Ni te chuan ṅawngkam na tak takin an hau ṅhin a. Hrehawm a tih thu kan hnênah a rawn sawi ve ṅhin; keini lahin ṅawngṅaipui leh thiam tawk tawka lo fuih bak tih theih kan nei si lo.

School tution fee te, Admission fee te chu an peksak duh lo fo va, *"In Didi (missionary)-te dil rawh u,"* an ti fo mai a. Keini pawh chu an fapa hruai kawituah min puhin, a khât tawka inhnial bap bap lah kan nei fo a ni.

A harsatnate hi sawi vek sen a ni lo. A Niin in aṅgin an hnawt chhuak a, a putea fapa in lualah a ṅawmpui a. A putea fapa 'Ravi-a' tia kan koh pawh chu inkhawmnaah a rawn hruai fo va. Ni khat chu ani chuan, "Didi, Baptisma hi ka chang ve duh tawh a ni," a ti a. *"Eng nge i chan duh chhan?"* tia ka zawh chuan, *"In zīngah kum khat ka tel ve tawh a. In vai hian in inhmangaih a, in inngaih-sak a, in hlim bawk a; mi hrang ka ni bik hian ka hre*

thin a. Isua chhúngkua tia i sawi fovah hian ka tel ve lo a ni,” tiin min chháng a. Keini chuan thla thum bawr vêl *counselling* nei chungin kan han enthla ve phawt a. Tichuan, ani pawh chu ringtu a lo ni ve ta ani.

Hun rei lo têah Ravi-a pa (Kundana putea) chuan a fapa, Kristian-ah a inpe tih a hriat chuan a *thinur* hle a, a in luah lai chu a man a peksak duh ta lo va. A fapa pawh chu a *bike* te a lâksak a. Nasa takin a khuahkhirh a, an in lamah a hruai kîr leh ta daih mai a. Kalna tûr dang awm si lo chu a Ni te inah bawh chuan Kundan-a chu a kîr leh ta a. An khuah an ina a haw chuan inkhawmna a awm dawn lo a ni.

Kundana chu lo kalin pawisa min dil a. A duh tam angreng viau mai a, lo pek mai tûr kan neih loh avàngin lungnur takin a haw a. Ni dangah pawh an mamawh viau chuan kan pe ve mai *thin a*; hnam dang an nihna laiah pawisa inpek chin tûr hi hriat thiam a har ve bawh *thin*

nên, ngaihtuahna a buai ve hle *thin a ni*.

Chutianga aharsatna te avàng chuan a rinna te pawh chu a lo chau ve a ni ngei ang, thla hnih vêl zet chu inkhawm duh lovin a tlanche ta *thin a ni*. A lu te ziat kawlh, milem pathian te bia-in inhlawhna a zawng kual a. Nasa takin amah hmuh hi kan tum *thin a*; mahse, kan hmél hmuh hi a duh lo tlat mai a. Pathianni zingah te chuan an inah kalin theih tawpin hmuh kan tum *thin a*; mahse, kan be thei lo.

Thla hnih vêl lai hnuah chuan a *thiante hnênah*, “*Ka ngaihsak tawh dawn lo va, a rilru a thlâk chuan ka inah lo kal rawh se,*” tiin thu kan chah a.

Hmuh tumin kan kal duh ta lo va. Kâr khat a liam hnu chuan minrawn *phone a*, “*Didi, i inah ka lo kal dawn,*” arawn ti a. “*Lo kal rawh,*” ka ti a.

Lu ziat kawlh vekin a lo kal a; a chêrin a hmél a pawr êm êm a. A hmél ka

han hmuh chuan ka rilru
 hi a na vawng vawng a, ka
 ðhin a rim hle bawk a.
 Ringthar zinga ka duh ber,
 ka ngainat leh rinna ðha ber
 nia ka hriat, milem pathian
 bia a, a tlan bo ka hmu chu
 ðhinrimna nèn, rilru natna
 leh khawngaihna te chuan
 ka khat ni berin ka hria.

Ka ðawng mai thei lo va,
 ka ke bulah ðhingthiin theih
 tawpin a ðap ni mai hian ka
 hria. Ka kuah a, nghet takin
 min kuah a, a lung a chhe
 tak zet a ni. Tih tak zeta
 fuihin kan hawtír ta a.

Pathianni a lo thlen
 chuan a lu chu puanin a
 tuam a, kan inkhawmna
 chu a hmaa a tih ang
 chiahin a lo tifai leh a.
 ðhutna te chu a lo phah leh
 thlap a. A va hmuhdawm
 tak êm!

Testimony a sawi a.
 Pathianin hla min pe a, 'tiin
 a sa bawk a.

*“Beram angin ka vak bo va,
 Khuarkhuruma ka tlak
 [dawn laiin,*

*Berampuin min rawn
 [chhan chhuak a.
 Ka tlan bo tawh lo vang.
 Isua bul hi a lo ðha ber e”.*
 tiin.

Inkhawmho chu kan
 vai maiin kan ðap a.
 Inkhâwm kan bang chu tu
 mahin haw zai kan rel lo va.
 Kan inchibai a, kan inkuah
 a, kan ðap a, kan nui bawk
 a. A hlimawm tih hian a
 sawi phâk lo.

Vawiin thleng hian
 ringtu a ni satliah lo.
 Ringtu ðha tak a ni a. a
 harsatnate chu a kiang
 vek chuang lo. Lal Isua
 nèna hmachhawn tùrin a
 inpeih a, Pathian nèna
 hma-chhawn tùrin a
 buaina chu a pe zawk a
 ni. Na tak chungin a lám
 a, a zai a, a ðawngðai
 bawk ðhin. **Chu chu a ni,
 Isua hnèna lo kîr leh
 chu.**

Kan harsatna tawhte
 hi Isua hnèna kîr leh nán
 kan hman phah em le? Nun
 inthlak thleng kan neih
 phah em le?



TRIPURA GOSPEL TEAM RAWNGBÀWLNA CHANCHIN
Part 1 (Thawh khatna - Thawh thumna)

Joseph Lalrinmawia
Evangelist, Pacharthal

Tripura Gospel Team chuan ni 2-21.02.2018 khán tuang takin Ganganagar Pastor Bial chhúnga khaw nga-ah rawngbàwlna a nei a. Kohhranhote min ṭawngṭaipuina leh Pathian khawngaihna-in mi 36 lai-in dam chhúnga Lal Isua hnungzui tura intiamin Baptisma an chang a, kan va lâwm tak êm!

Tripura Gospel Team member-te hi thla tin mi 10 ruat thar ṭhin an ni a; kan hun hman dân pawh a inang diak diak thei lo a ni. Tùn ṭumah hian February thla chhúnga Tripura Gospel Team-te rawng-bàwlna bik kan sawi dawn a ni.

Kan rawngbàwl chhúng hian thupui “INPUMKHAT-NA” tih kan hmang a; hei bâkah hian a tam thei ang ber ṭawngṭai leh Bible chhiar-thuvawn-ah kan nei bawk a ni. Kan hun hman dân tlángpui chu:

6:00 A.M. - 6:30 A.M. (*Thingpui/Intihfai*); **6:30 A.M. - 6:45 A.M.** (*Fianrial hun/Ṭawngṭai rual*); **6:45 A.M. - 9:30 A.M.** (*Group 2/3-a inṭhena ringlo in tlawh*

kual); **9:30 A.M. - 11:00 A.M.** (*Tûkṭhuan/hah-chawlhna*); **11:00 A.M. - 12:00 Noon** (*Bethel/Bible Study*); **12:00 Noon - 1:00 P.M.** (*Thingpui*); **1:00 P.M. - 4:30 P.M.** (*Ringlo in tlawh kual*); **4:30 P.M. - 5:00 P.M.** (*Zanriah*); **5:00 P.M.** aṭangin zân lam programme atána inbuatsaihna

Zànah chuan thusawi (Sermon) hmam mipui koh khâwm nán Projector hmangin zai/lâm kan entír a, mipui an pun khâwm tam hnuah Projector titâwpin dâr 7:00 vêlah Pathian thuchah kan ngaihthla ṭan ṭhin a ni.

Pathian thusawi kan ngaihthlâk zawh hian an

nun kaihruai thei tùr *film* (Khawvêl siam thu/Nova/Fapa tlan bo/Passion of Christ/Mi thianghlim lawr etc.) kan entír òin a ni. Zàn khatah hian a *film* azirin *film* hnih chhuah cháng kan nei bawk. Sermon neih zawh leh *film* chhuah zawh hian sàwmna hun kan siam òin a; tin, kan lènnaah hian Isua ringa Baptisma chan an duh leh duh loh kan zâwt nghâl zêl bawk a ni. Zàn dár 9:30-ah *devotion* hun kan hmang leh a; hetah hian chhùn lama kan hun hman leh kan tlai lènna chanchin te kan ngaithla a, òawngtaipui ngaite kan òawngtaipui a, dár 10:00-ah kan mu òin a ni.

Rawngbáwla kan chhuah hun lai hi Tripura Assembly Election lai tak a ni a. A òantir lamah phei chuan kan *Programme* rawn chhimtu pawh kan nei tam lo òin hle mai a, naupang leh kum upa lam deuh chauh an lo kal khâwm òin. Òawngtaina nèn theih tâwp kan chhuah ve tak meuh meuh chung pawhin kan bei a dawng ru tláng thei hle a ni. In lama kan len chhuah

ve lahin *Political Party Campaigner* emaw kan nih tiin, ‘*Eng Party nge in nih ve?*’ min lo ti tâwk an awm bawk a, Pathian thu sawipui an harsa thei hle a ni.

Thawh khatna - Min hnar mah se, beidawn hnuah Lalpan naupang pali min pe: Kan kalna khaw hmasa ber Boikhonto Para (Vân ram khua)-ah phei chuan *Programme* hmanna tùr (*Film* chhuahna tùr) pawh kan haihchham lek lek a ni. Zàn hmasaa kan *Program-me* hmannaah hman leh tumin kan bungrua nèn Km khat vêl kea kalin kan inzâwn phei a; mahse, in neituin a lo phal ta hauh lo mai a. Kan naute hmun dang zawng tùrin an chhuak òha leh a, rei tâwk fang an thang hnuah zàn hmasaa zurui deuh chung a kan *Program-me* rawn chhim vetu in kawtah chhuah a rem thu an rawn sawi hlauh va. Kan bungruate kan inzâwn phei leh ta a, *Programme* pawh tuang takin kan hmang ta a ni.

Kan kalna khaw hmasa berah hian a zàn thumnaah

pawh ringthar Baptisma chang duh hmél kan hmu hlei thei lo va. Baptisma chang duh awmchhun hmeichhe naupang kum 12 mi vèl chu a pa kan han dil a, “*Ka dam chhúng chuan Kristian a nih ka phal lo, ka thih hunah chuan a duh duhnaah a awm thei ang,*” a lo ti bur mai bawk si.

A zàn tawp berah chuan Speaker thusawi zawhin sàwmna kan han siam leh a; naupang paliin Baptisma kan chang ve duh, tiin an ban an rawn phar chhuak ta hlauh a. An hming kan la a, a tûk zingah chian tûrin kan va kal leh a. Kan hlauthawng ru hle mai a, a hmaa mi ang bawk khán chhànna déngkháwng tak kan hmu leh ang tih kan hlau khawp mai a. Mahse Lalpan kan beidawn a phal reng bîk lo a lo ni; an nu leh pa te pawhin an lo phal thlap a. An *Aadhar Card* aţangin an hming leh pian ni leh thla te lain, Bialtu Pastor kan hrilh thuai a, hmun danga kan insawn chhuah hma hemi tûk vèk hian naupang kum 11 – 13 inkâr mi 4 te

chuan Baptisma an chang ta a ni. Lalpan kan hlauhchham a lo phal lo a lo ni. Lalpa chu fakin awm rawh se.

Thawh hnihna - Pathian thil thlawn pèk leh ke zeng, Isua tihdamna ringtu:

Hemi tûm hian Msha Tuisa khuaah hun kan hmang a. Kan thlenna atána an lo ruahmanah kan han invawm lût a. Kan thlenna tûrte in a tê angreng si a, mi 10 lai kan ni bawk si nèn, kan huphurh ru khawp mai a. Mahse, a bul maiah chuan bawng in tûr (Tripura Sorkar-in an khaw tána a saksak, bang nei lo) a lo awm hlauh mai a, kan tifai ta a. Chutah chuan ei rèlna tûr nèn mi panga a riah theih a, *Silpauline*-in a bang kan inzàr chawp a. A lo remcháng phian mai a, tui in tûr lah Sorkar-in Solar hmanga thingtláng khaw tána a ruahmansak, rin tûr a lo awm leh zèl a. Pathian hi a tha-in, rem a va hre êm ve aw! hmanruate hi a lo vàn ngah êm! ‘*Sorkar-in kan tán awmna leh tui in tûr tha tak tak min lo ruahmansak a*

nih hi' kan ti a. Khaw daia inthiar mai mai tura inngai kha Sorkar Septic Tank siamah ngat kan han inthiar thei ta bawk a, kan va vannei lehzêl êm!

Anni khua pawh hian min ngaihsak lêm lovin, an inhawng lo angreng khawp mai a. Hrethiam tak chungin dawhthei takin kan bei zêl a. Sawi tawh angin, Election dawn a nih avàngin puitling leh thalai lam chu hmuh tûr an awm hman meuh lo. Tripura-ah hian kawng zawh an uar khawp a, an Party tam leh tam loh tehfung pawimawh tak pakhat a ni reng a ni. Bazar ni phei chuan Party tin deuh thawin kawng an zawh thin a, zing kâra kan han léng chhuak pawh kawm theih mumal an awm lo va; *'kawng zawh tûrin kan kal dawn a'* an ti deuh zêl mai a. Kan kawm theihho chu tar lam leh naupang an ni deuh mai zêl a, a beidawnthlâk duh khawp mai.

Chutih rual erawh chuan kan kawm tura Lalpa min pêk chhun chhunte

erawhin min dawngsawng tha angreng fû thung a. A tawp zân kan thlen meuh chuan Baptisma chang duh mi 11 lai hming ziak kan nei hman a; amaherawhchu, Baptisma *Programme* kan neih zân hian Baptisma chang tura kan beisei mi 11-ah mi pangain Baptisma an chang thei a ni.

A chang ve thei ta lo zinga nula pakhat chu Baptisma chang tûr hian a rawn kal tawh a, a dawn hnaih tak takah a nu-in a phal leh lo va. An inhau nasa khawp mai a, chan a duh si, a nu-in a phal si lo. Ral aţang hian an inhau thâwm kan hre pha reng mai si a, rilru a khawih duh ngei mai! Engtik ni-ah emaw chuan Lal Isua hnung zuitu tha tak a la nih ngei kan ring tlat a ni. Tin, Baptisma chang tura kan tih nula pakhat erawh chu Baptisma *Programme* kan hman zawh tawh hnu, Pastor-te pawh an haw vek tawh hnuah a rawn thleng chauh va, hemi zân hian a chang hman ta lo va, a tûkah a hranin chantîr leh a ni.

Baptisma chang zingah hian chhúngkuua Baptisma chang an awm a. An pa ber hi a ke a zeng a, kan kawm tirh ațang rêngin Pathian thusawi te a ngaithla uluk êm êm a. An sakhaw hlui lamah damna beiseiin an neih chhun chhunin inthawina (Puja) pawh an ti nasa tawh a, damna a chang thei chuang si lo. Ramhuai hnêna intiamna (manasi) pawh a lo ngah khawp mai a, Baptisma chan zawh hian chûng thil zawng zawngte chu rawn lain, an paih nghâl vek a; kan riahbûk lamah la pheiin, min ngen angin kan halralsak a ni. A intiamna pakhat a thing phun (Búng) pawh paih tûra min tih angin Gospel Team-ten pawt phawiin kan paihsak nghe nghe. Lal Isuaah damna a awm tih hriain, tûnah chuan dam chhúnga Lal Isuaa hnung zui tûrin huaisen takin a rawn inpe ta a ni. A tán pawh theih tâwpin i țawngțai zêl ang u.

Thawh thumna – An rawn ‘JINDABAD’ ni tin deuh thaw: Bangladesh ramri hnaih tak, BSF camp

awmna hmun, Champarai khuaah a thawh thum nán kan lût a. Hetah hian thawktuin a țhut chilh chungin ani pawh a beidawng ve thei khawp mai. Tripura inthlan pui lah a hnai tual tual a; kawng zawh tûr, Pick-up eng emaw zâtin an rawn in-trip a. An rawn ‘JINDABAD’ ni tin deuh thaw mai a; beisei a sang lo leh pek hle mai.

Chhùn lama kan *Programme* hmanna atána kan tih, BSF lamah pawh *permission* kan lâk fel diam tawh, an Bazar Shed lah chu Party lamin kan hman hmain min luah khalh daih a; thawktu *quarters* bulah *Programme* kan hman hlah thung. *Programme* chhimtu pawh anni aiin kan ngah ta zâwk hial.

Tripuri venga zing kára kan len chhuaahnaah chuan veng hmáwr ațangin kan tuam a. Chhúngkaw pakhat hian sai hlum an lo hrual a; tihtlángnel nán tiin kan han hrualpui ve a, kan zing pakhatin a lo ti tipui baw a. Pa ber chu a têt lai pawha Mizorama lo

awm ve tawh òhin hi a lo ni a. “*Kristian-ah i awm duh em?*” kan han ti a. “*Hmànah pawh ka awm tawh a, ka awm peih tawh lo. Hindu-ah ka awm rih dawn,*” a ti tlat mai a, a beidawn thlák duh hle. Hindu-a a awm duh chhan lah zu in duh vâng chauh a ni bawk si a.

Duh lo na nâ nâ chu tiin kan kalsan ta a, an òhenawmpa inah luh leh kan tum a. Ani chuan min hmuh veleh kawngka a khâr a, a léng chhuak daih a. Chutiang zélin in 4 vèl lai chuan kawng min khâr khum a, kan beidawng tláng ngei mai. Min lo dawngsawng òha bertu lah chuan, ‘*Intiamna (Manasi) ka neih zawhah ka la Kristian ve ang,*’ tiin min chháng a. In 20 vèl zet awmna vengah kan léng a, min lo dawngsawng duh chu in 4 vèl chiah kan tawng a ni. A boruakin a zir lo bawk a, an inhawng ngang lo niin kan hria.

Òawngòaina nasa leh-zuala neiin kan òang tláng

hlawm hle a. Kan hlawh-chham mai dawnin kan hria a; an lo vah hun lai a ni bawk nèn zingah hma tak takah an chhuak a, kan hmu hman mang lo a ni ber. Chuvàng chuan zing kâr *devotion* pawh ‘*len hawhunah nei ila, hma deuhin i léng chhuak ve mai ang u,*’ kan ti a.

Kan han léng chhuak ta a, mi eng emaw zât chu kan hmu hman ta a, kawm tùr pawh kan hmu ve thei ta hlawm a ni. Zàn lama kan *Programme* rawn chhim tùrin kan sawm zél bawk a, chhimtu pawh beisei ai tak chuan an òhahnem òhin a. Kan len chhuahna leh sàwmna kan siam aòangin mi 11 lai mai Kristian nih duh kan nei ve thei ta a; min òhulhsan leh mai hlauvin kan theih tàwp tak meuh meuhvin Pathian hna-thawh dílin kan òawngòai zél a.

A tàwp zànah chuan a bo a bâng awm lovin mi 11-in Bialtu Pastor kutah Baptisma an chang ta a ni. Lalpa kan va láwm êm!

Part II (Thawh 4 & 5-na) chhonzawm tùr...

ASSAM MISSION FIELD HI*Upa R. Lalbiakthanga, Venghlui*

Assam Mission Field hi keini, Venghlui Presbyterian Kohhran chuan ni 21-27.11.2017 chhúng khán kan zu fang ve a, mi pasarih kan kal a. Kan hun a chêp deuh avàngin Field pumpui kan fang hman lo va; Pastor Bial pahnih - Guwahati Pastor Bial leh Tejpur Pastor Bial chhúnga kan rawngbàwlna hmun hrang hrang kan tlawh a. Dibrugarh Pastor Bial kan tlawh hman ta lo va, hei hian rilru a tipangkhang hle thung.

Ni 22.11.2017-a Guwahati kan thlen thlák veleh kan Field Secretary, Rev. H. Lalhmingmawia leh Guwahati Pastor Rev. Vanlalngena te leh thawktu dangte nèn kan hun hman dan tùr leh kan hmun tlawh tùrte kan rél ho va.

Ruahman angin ni 23-26.11.2017 chhúngin kan Mission rawngbàwlna hmun hrang hrangte - Nalbari, Sapangaon, Bhairabkunda, Dekhijuli, Tejpur, Biswanath Charali, Japaubari, Tinisuti, Lalpani, Nagaon, Satibari leh Beltola te kan tlawh a; kal pahin 3rd I.R. Police awmna Mangaldai kan tlawh a; Bhairabkunda kan

thlen hlimah Arunachal State chhúngah lûtin Balem Kohhran kan tlawh a; tin, Bhutan ram chhúngah kan va lût ve zâwk a; mamawh ðhenkhatte kan lei nual bawk.

Hêng kan hmun tlawhte aþang hian thil sawi châkawm tak tak a tam hle a; mahse, a pawimawh zual chauh sawi ila. Chhúngte chu -

1) Kan kalna apiang-ah kan thawktuten min lo dawngsawng þha hle a, an inpêkna leh an þhahnemngaihzia han hmuhin a làwmawm kan tiin an fakawm hlein kan hria.

2) Kan hriat angin, Assam Mission Field hi kan

Field hrang hrang zingah a tharlám berte zinga mi a ni a; Kohhran mimir hriat an hlawh vak lovin a lang. Anmahni pawhin, *'Kan Kohhranhote hian min thlawh khûm deuh chu a ni,'* an ti a. Tlawhtu pawh an nei tam lo a ni ang - hmun pakhatah phei chuan, *'Kohhran anga tlawhtu kan neih vawi khatna in ni,'* min ti a, an lâwm ve hle.

3) Assam State chhúnga ah hian hnam dang chu awm ve baw mah se, a tam ber chu Assamese hi an ni a; anni hi kan rawngbâwnain a tinzawn ber, kan *target group* an ni. Anni hi Hindu sakhaw bia an ni deuh ber a; an zia a nghetin an sakhuaah hian an nghet khawp mai. Tin, an sakhuaah hian an lung a awi tlangpui a, sakhaw danga inleh mai an awlsam lo khawp. Chutih laiin, Kristiana inpe tawh vèk vèk chu an nghet hle thung a; an hawikîr mai mai lo niin a lang. Chûng zingah chuan rawng kan bawl ber a; kan Field a la tharlám bawh nèn, ringtu neih zung zung

a awlai lo hle. Amah-erawhchu, thawktute inpêkna leh Pathian hnathawh avàngin ringtu chu an pung ve zêl a; thawktute rawngbâwlna report a ngaihnaawmin a lâwmawm hle thung. Kum 2016 chhúnga Field pum puia bapisma chang zât 48 an ni a, kum 2017 chhúngin mi 80 an ni.

4) Kan thawktute hian rawngbâwlna kawngah harsatna hrang hrang an tâwk ve a. A tam zâwk chuan ringlote lakah harsatna lian tham an tâwk lova, thenkhat erawh chuan RSS te lak aţangin harsatna leh dodalna hrang hrang an tâwk thung a, vauna te pawh an tâwk bawh. Kan kalna apiang deuhthaw-a harsatna inang tlang an tawh an lo sawi thin chu Inkhâwmna tûr Biak In tha an mamawh thu a ni. Assam Field chhúngah hian inkhâwmna tûr Biak In nei Fellowship chu tlém tê an ni àwm e.

Sawi hmaih theih miah loh chu, Assamese-ho hi hnam dangte ang lo takin,

mi mal in emaw, thingbuk hnuaiiah emaw inkhâwm tûra sâwm chhuah an harsa khawp mai a, an duh lo tlangpui a ni ber mai.

Hemi avàng hian kan thawktute hi an rualawt ngawih ngawih a, *'Biak In pangngai chu nei ila, inkhâwm tûrin mi tam zâwk kan sawm lût thei ang a, Kristian pawh kan pun phah hle kan beisei a ni,'* an ti a ni. A dik takin, hêng kan thawktute awmna thenkhatah hian Kohhran Pawl thenkhat hun rei tak chhúng lo inbengbel tawh, hmun leh Biak In tha tak tak lo nei tawh, rawngbâwlina chhunzawm tha thei si lo te pawh an awm a; kan member-te zingah a la chhunzawm thei chhunte hnêna lo inpe tâwk an lo awm bawk.

Hêngte avàng hian kan Field hotute pawhin Project te siamin hmun lei leh Biak In sakna tûr *proposal* te pawh Mission Board lamah

an rawn theh lût ve tawh thin a; sum indaih lohna avàngin duh angin a tihhlawhtlin theih loh te pawh a lo ni a. Hêng han hriat chuan a tihngaihna tak hriatpui lo mah ila, thahnemngaih a na duh khawp mai. Eng pawh ni se, hetiang a Field kan hawng a nih rau rau chuan, hlâwk zâwka rawngbâwlina kan neih theih nân ram leh Biak In a tam thei ang neih dân ngaihtuah theih ni se a lâwmawm khawp ang.

Tin, harsatna an tawh leh pakhat chu inphumna tûr Thlanmual chungcháng a ni. Hindu-te angin an inhal ral ve mai tawh si lo va; kan mite an thihin a buaithlâk hle a ni àwm e. Hei pawh hian ngaihtuahna a tithui hle mai.

5) Hetiang hi an dinhmun a nih avàngin Zoram Kohhranhote an tána thahnemngai taka tawngtaisak tûrin min chah mawlh mawlh a ni e.

Sâm 84:10: I biak in hung chhúng kawtlaia ni khat awm hi, ni sângkhat aiin a tha zâwk si a. Suahsualna puan intea awm ai chuan, Kan Pathian ina kawngkhàr véngtu nih pawh ka duh zâwk a ni.

KARIMGANJ-AH KRISMAS

H. Chaungneihthanga

Kan Synod hmun pawimawh tak pakhat, Rowlands Memorial High School, Karimganj-a thawktuten kum 2017 Krismas hmanpui tûrin Chhinga Veng Kohhran an rawn ngen a; chawp leh chilh deuh mah se an rawn ngenna ngai pawimawhin Krismas hmanpui chu thain a hria a. Kohhran chuan K.Ṭ.P. member aṭangin mi 30, Masihi Sangati member aṭangin mi 20, Kohhran Pavalai aṭangin mi 10 leh Kohhran Committee aṭangin mi 2 kal tûrin a ruahman a. Karimganj District-ah hian Mizoram mipui aiin an tam hret a, mi nuai sawm leh pahnih an awm a ni.

Inbuatsaihna: Kan hruaitute chuan Karimganj lama kan Pastor leh Kohhran Secretary te chu beráwnin, kum danga Krismas an lo hman thin dân te leh kum 2017 Krismas hman dân tûra an duh dân te an sawi ho va. Ringtharte leh Karimganj mipui, Lal Isua la hre lote tâna hlâwk taka Krismas programme kan hman theih nâna ruahmanna an siam te chu bawhzuiin theih tâwpin ṭawngṭaina nèn kan inbuatsaih a. Mahse kum tawp lamah hian YMA programme leh khawtlangah chhiatnain min bawh buai bawk nèn

kan inbuatsaihnain duhthu a sâm ta lo hle mai a. Pathian rinchhanin kan kal chhuak tawp a ni mai e.

Kalkawng: Ni 23-12-17 (Inrinni)-ah Ṭhuampui aṭangin zing dâr 8.00-ah Bus pahnihin mi 61 kan chhuak a. Bualpuiah tukṭhuan eiin, tlai dâr 6:30-ah Karimganj kan lût a. Mission thawktuten hlim tak leh phûr takin mi an lo dawngsawng a, zanriah tui tak min lo buatsaihsak chu Headmaster tual zawlah min eitir a, kan lâwm hle a ni. Zanriah ei khamah Headmaster Quarters-ah Bialtu Pastor Zobiak-

tluanga hovin Compound-a thawktute nèn Pathian hnêna lâwmthu sawina leh kan Krismas programme a hlawhtlin theihna atán kan ÷awngñai ho va. Hemi hnuah hian kan riahna tùr ÷euh - mipaho Rowland *building* chung sangah, Hmeichheho *building* chhawng hnuai ah, Pavalai ei rawngbáwl tùrte Headmaster Quarter-ah tui takin kan mu hahchàwl a ni.

Pathianni (Krismas Ùrlâwk Ni: Ni 24-12-2017 (Pathianni) Krismas ùrlâwk ni chu Karimganj khawpui chhúnga kan Kohhrante tlawh nán Group thumah inñhen darhin kan feh chhuak a. Group 1-na Karimganj Kohhran-ah Upa Lalthanga hovin; Group 2-na chu Subash Nagar Kohhran-ah Pu Lalthara Synod Revival Speaker hovin an kal a, Pavalai in an zui a; Group 3-na Lokhi Bajar-ah Pu H. Chawng-neihthanga hovin, Masihi Sangati zaipáwl an kal a. Group tin hian programme ÷a takin an hmang thei vek a, Biak In khatin an inkhâwm a, inkhâwm

banah thingpui ruai an ÷eh ho a ni.

Kawng zawh pui: Kum danga an lo tih fo tawh angin Krismas ùrlâwk (Pathianni) tlai chu Krismas chibai bük nán leh Rowland Memorial School Compound-a Krismas *Programme* hmang tùra mite sàwm tùrin khawpui chhúng kawngpui lun laiah te *Truck* pahnih hmangin kan vâk kual a. Pakhatah *sound box* lian pui pui te, *light* te leh *Generator* te phurh a ni a; pakhatah milem chi hrang hrang - Krismas putar te, Mari leh nausen Isua te, Josefa te, Berâmpu te leh Krismas tree mawi tak te a awm a.

Krismas hla ring tak leh ÷ang tâwk taka zaitír (*play*)-in a hnungah mipuiin hlim tak leh phûr takin zai leh lámin hnung kan zui dul dul a. A sirah sipai silai leh tiang kengin a tâwp thlengin *motor* min su buai tùr leh tlai *bajar* mipui leh ran min tibuai thei lakah mi an véng a, a va thlamuanthlâk êm! Zai kâr lakah Krismas Ni-a

Mission Compound-a kan *program-me* hman tûrah mi zawng zawng lo tel tûra sàwmna puan a ni reng baw k a. Sound ring hle mah se, ri béngchhéng zâwnga *sound* kiu ruai ruai a awm miah lo.

Kawng sira mipuite:

He Krismas kawng zawhah hian kawng sira mipui, Krismas chibai lo bûktute hian hlim hmél pu takin Krismas chibai an lo bûk a. An lo ding zum mai mai lo, keini Mizo Kristiante hian an hnên aţanga zir tûr kan ngah hlein ka hria. Krismas putarin *chocolate* a ţheh te hlim takin an lo dawng zêl. Kan member-ten lâm paha an *chocolate* semte pawh chibai chungin hlim takin an lo dawng zêl.

Pandal Programme:

Krismas hmanna tûr Pandal hi mi 1200 lenga sak a ni a, kan thawktuten an Krismas ruai ţhehna tûr thawhlâwm an thawh khâwm aţanga an sak a ni. Krismas ruai ţheh lovin Lal Isua, khawvêl Chhandamtu lo piang chu a la hre loten an lo hriat ve theih nán an

inseng ral a ni. Kan *programme* hi Krismas tlai dár 6.00-ah kan ţan a, kan ţan hma hian ţhutthleng zawng zawng bâkah sikul tual zawl leh kawngpui zau tâwkah te mihring kalna pawh awm lovin mipui an ding khat tlat a ni.

Bialtu MLA leh Party hruaituten he kan *programme* hi minrawn ho va, thu te an sawi baw k a, kan lâwm hle a ni. Kan Pastor Zobiaktluanga leh kan Upa-in anmahni ţawng ngeiin Krismas awmzia, Lal Isua lo piang hi mi zawng zawng chhandamna tûra lo kal a ni tih ţahnemngai takin an sawi a. Chhinga Veng Kohhran aţangin Zaipáwl, Live Band, Drama, Worship Dance, Vai lâm, Cherâw, Solo, Male leh Female Voice te an awm baw k a ni.

Kan ţalaiten *platform-* a phûr tak leh hlim hmél taka an han lâm leh zai te, phûr tak leh ring tâwka *Guitar* an han zût ţê vawng vawng mai te khân ngaihtuahna a tisei hle. Keini pawhin Zoram-ah

pawh hian thalaite tel duhna tûrin Guitar te, Drum set te leh Keyboard te nèn han léng khâwm ve ila a tha àwm mang e. Kan thalaiten, “*Vawi tam tak Krismas ka lo hmang ve tawh a, hetiang hian ka la làm ngai lo,*” te an ti a, a va ngaihnaawm êm! Kan Programme dârkâr li chhúng hian tu mah zurui buai leh meizial zu an awm lo, zir tûr kan va ngah êm!

Tlangkâwmna: Karimganj khawpuia Chhinga

Veng Kohhran ten Krismas kan hmanna tûra thahnem ngai taka Kohhranhote leh mi mal, min lo thawnghai-puitute zawng zawng chungah kan Kohhran aiawhin làwmthu ka sawi a ni.

Kumin Krismas lo thleng leh tûr atán hian kan chhehvêla Lal Isua anmahni chhandamna tûra khawvêla lo kal la hre lote hnênah Chhandamna thu hril tûrin hawh u, i inbuat-saih sauh sauh ang u.

RAMTHAR CHANCHINBU MAN BIH CHIANNA

Lalthlahlova Sailo, Luangmual

Ramthar Chanchinbu man hi i han bih chiang dawn teh ang.

Chhut zât (32,900-a chhûtin): Kum 2017 aţangin copy khat l lâkna man hi ₹ 5.00 a ni a, kum khatah chuan ₹ 60.00 a ni. Ramthar Chanchinbu man hi bat awm lovin Office-ah lût vek ta se, kum khatah chuan $32,900 \times ₹ 60.00 = ₹ 19,74,000.00$ a ni ang.

Chhut man: Copy khat zêl chhut man hi ₹ 6.80 a ni a. Tichuan, thla khata copy **32,900** chhutna man chu $32,900 \times ₹ 6.80 = ₹ 2,23,720.00$ a ni a; kum khat chhut man ₹ $2,23,720.00 \times 12 = ₹ 26,84,640.00$ a ni.

Hlêp nge hloh?: Kum khatah Ramthar manah ₹ **19,74,000.00** hmuh lêt beisei theih a nih lain, chhutna manah kum khat chhúnga senso ngai zât chu ₹ **26,84,640.00** a ni a; ₹ **26,84,640.00** - ₹ **19,74,000.00** = ₹ **7,10,640.00** a hloh thin tihna a ni ang.

Missionary-te tána chanchinbu lâksak thin Kohhran hrang hrang (leh mi mal) kan awm thin a. Hêng pawisa tling khâwm te nèn pawh hian a la indaih chuang lo a ni. Kum 2017-2018 aţang hian Synod Budget-ah hian Ramthar Chanchinbu subsidy atán ₹ **5,00,000.00** dah a ni a; hei hi a làwmawm hle.

Subsidy ₹ **5,00,000.00** dah chung hian ₹ **2,41,000.00** chawi belh a la ngai dawn a ni.

Kohhran lian deuh-hoten Ramthar hi kan Missionary-te tána lâksak lamah hian tûn ai hian ţang deuh ila, chanchinbu enkawltute harsatna zualpui chu a nêp deuh ang.

Missionary 2000 chuang hnênah Ramthar Chanchinbu hi athlâwnin (*a lâksaktute zarah*) Office lam hian an thawn thin tih hi mi tam tak chuan kan hre lo mai thei. Tin, Ramthar copy 11 aia tam sem thin Agent-te chu a free-in an pe zêl bawk. Dâk kal tlanga Ramthar la thin mi ţhahnem tak an awm a, a thawn nân hian chêng tam tham tak sen a ngai thin bawk.

Ramthar Chanchinbu hi intodelh tûr chuan kum khat lâk man hi ₹ **100.00**-ah emaw ₹ **90.00**-ah emaw tihsan ni se, a ţhat a rinawm.

LAL ISUA THAWHLEHNA

† Chanchin Ţha bute hian Thawhlehma hi an sawi fiah lo va; Thawhlehma hian Chanchin Ţha bute hi a sawi fiah zawk a ni. Thawhlehma hi Kristiante rinnaa tel ve satliah ni lovin, Kristiante rinnaa bulpui ber a ni.

- Rev. Dr. John S. Whale-a

RAMTHAR FEH**1.**

- 1. Field hming** : Nepal Mission Field
2. Khua : Sundarpur
3. Tlawh hun chhúng: Ni 11.10.2017-4.11.2017
4. Tlawhtu : Armed Veng North Kohhran
5. Kal zât :Mipa – 12; Hmeichhia - 1
6. Tlawh chhan : Hnathawh
7. Hnathawh : Clinic sak leh Biak In step siam
8. Senso zât : ₹ 1,46,000.00

9. Làwmawm lam: Sundarpur Kohhran leh Bial chhúng Kohhrante inpêkna kan hmuhin a ropui kan ti. Kohhran miten kan hnathawh hi phûr takin min ÷awiawm reng a, kan hna pawh a chak phah hle a ni. Kohhran tê tak tê mah ni se, an theih tâwpin min lo dawngsawngin min lo duat a ni. Bial chhúng kohhran hrang hranga kalte hi a remchan angin thusawina hun min lo pe hlawm a, kan hlim tlângin kan hlâwkpuoi hle a ni. Kan kal hun hi Dharan Pastor Bial Workers' Meet an lo neih lai a ni a. ÷awngtaipui tùrin Work Camp-a kalte min ngen a; an programme hlawhtlin nân tlaivárin hun kan va hmanpuoi nghe nghe. A tûkah hna khaihlak awm lovin kan hna kan chhùnzawm tho a ni. Nl. K. Lalnunpuoi (Missionary) hian kan thlen hlim aţangin kan chàm chhúng zawng min buaipui a, kan haw tùr pawh a ÷iannu (Nepali) nèn min thlah leh thlap a ni.

10. Report tûl dang: Sundarpur Kohhrana thil danglam tak mai chu an Kohhran Chairman hi hmeichhia a ni tlat mai, Upa an la neih loh vâng a ni ber àwm e. Kan hnathawh chhúnga rawngbâwlna hun rei lo tê kan neih aţangin kohhrana hnung tawlh tawhte hnêna rawngbâwl tûlzia an hmu a, Chanchin ÷ha hril lam an tuipui thar nghâl hle niin kan hria. Keini pawhin kan chàm chhúng hian ÷awngtaina nèn theih tâwp kan chhuah a, chu chuan rah ÷ha a chhuah niin kan hria a, kan lâwm hle. Sundarpur Kohhran tân hian dekchi lian ÷ha tak kan pe a, an lâwm thiam hle a ni. Work Camp-a kalte hian kan hun hman hrang hrangte hi kan hlâwkpuoi hle. Kawng tinrênga min duhsaktu, Sundarpur Kohhran leh Pathian chungah làwmthu kan sawi tak meuh a ni. Lalpa chu fakin awm rawh se.

Lalthanzauva, Work Camp Ziaktu

2.

- 1. Field hming** : Tripura Mission Field
- 2. Khua** : Agartala
- 3. Tlawh hun chhúng:** Ni 2-7 November, 2017
- 4. Tlawhtu** : Chatlang Kohhran Hmeichhia
- 5. Kal zât** : Mipa – 1; Hmeichhia - 33
- 6. Tlawh chhan** : *Project tihhlawhtlinna*
- 7. Hnathawh** : Bial chhúng kohhrana inkhâwm
- 8. Senso zât** : ₹ 1,51,965.00
- 9. Làwmawm lam:** TMF Field Secretary, Rev. Lalengzika te nupa hi kan Kohhran ațanga chhuak an ni a. An rawngbâwlna a hmun ngeia kan hmuhpui thei hi kan làwm a; thawktute inpêkna leh min lo buaipuina avàngin kan làwm hle bawk. Ringthar an neih belh thei deuh reng mai te hi a ropui kan ti a, thawktute leh Pathian chungah làwmthu kan sawi tak meuh a ni. Keiniho pawhin Ramthar Field kan vei haw hle niin kan hria a, hlâwk kan inti hle.
- 10. Report țul dang:** Ni 2 (Ningani) zîng dâr 7:00-ah Upa Malsawmdawngliana (Kohhran aiawh) hovin kan veng chhuahsanin Silchar Mission Compound-ah kan riak a. Hetah hian kan Kohhran ațanga missionary-a chhuak – Nl. Vànhmingthangi leh Pi C. Lalrinmawii te nupain min lo buaipui a, an chungah kan làwm hle. A tûk tlai dâr 7:00-ah tuang takin Agartala chu kan thleng thei a ni.

Kan chàm chhúngin Agartala Kohhrana kan inkhâwm bâkah, Group hrang hranga inthenin kohhran paruk (*Sachia Para, Khampar Para, Chintaram, Satûkura & Konai*)-ah kan inkhâwm a, țanpui nân ₹ 5,000.00 țheuh kan pe. Hêng kohhrante hi member tlém tê tê an ni a; chuti chung chuan rawngbâwlnaah an țang rualin an theih tâwpin Pathian leh kohhran tân ke an pên ve zêl a ni. Ringtu nghet leh puitling an nih zêl theih nân te, Pathian ram a zauh zêl theih nân te leh thawktute tân ringtharte tân i țawngțaipui zêl ang u.

Ni 6 (Thawhtanni)-ah Silchar-a riak chho lehni ni 7. 11. 2017 tlai dâr 4:30-ah tuang takin Aizawl kan thleng leh thei ta a ni. Pathian kaihhruaina kan dawng nasa a, Pathian hnênah làwmthu kan sawi tak meuh meuh a ni.

Lalroêngi, Kohhran Hmeichhe Ziaktu (Asst.)

3.

1. **Field hming** : Barak Area
2. **Khua** : Pailapool Bial
3. **Tlawh hun chhúng**: Ni 3-6 November, 2017
4. **Tlawhtu** : Luangmual Bial Kohhran Hmeichhia
5. **Kal zât** : Hmeichhia - 27
6. **Tlawh chhan** : Ramthar Field tlawh
7. **Hnathawh** : Bial chhúng kohhrana inkhâwm
8. **Senso zât** : ₹ 98,000.00

9. Lâwmawm lam: Kum 2017 chhúnga Ramthar Field tlawh tùr hian Bial Inkhâwmpuiah budget siam a niin, a kalten kal man thawh khâwm a ni bawk. Pathianin min hruai a, tluang takin Field kan tlawh thei a ni. Pastor, Pro Pastor leh thawktu ten min lo dawnsawn dân – remruatna fel leh tha tak min siamsaka, hun tha leh hlimawm tak, hriat reng tlâk kan hming thei hi kan lâwm hle a ni.

Ni 4. 11. 2017 (Inrinni)-ah Joypur Kohhran (kan Kohhran member, Nl. H. Lalrinêngi, S/N thawhna) Biak In thar lâwmnaah fatu-ah kan tâng a. Hemi zawhah hian kohhran dang panga kan tlawh thei a; thuchah sawina hun te min siamsak a ni. Kohhran paruk hnênah tanpui sum bâkah thawmhnaw leh mutbu thahnem tak kan hnutchhiah bawk.

10. Report tûl dang: Bial chhúng kohhrante an khawhar hle a. Chuti chung pawha an tuarchhelzia leh thahnem ngaihzia te kan hmuhin a ropui kan ti a, kan rilru a khawih hle a ni. Field tlawha kal ho, Bial chhúng member-ten inpawh tlang taka rawngbâwl hona tha tak kan nei thei hi a lâwmawm kan ti a, zawngchhang tlâk kan ti hle a ni. Pailapool Pastor quarters *fencing* siam that khu a tûl hlein kan hriatpui a ni.

P. C. Nuzawni, Bial Kohhran Hmeichhe Ziaktu

4.

1. **Field hming** : Tripura Mission Field
2. **Khua** : Horidon, Ruprai Pastor Bial
3. **Tlawh hun chhúng**: Ni 20-25 Nov., 2017
4. **Tlawhtu** : Saikhamakawn Kohhran
5. **Kal zât** : 7
6. **Tlawh chhan** : Hnathawh

7. Hnathawh : Biak In hmun tûr lei chhùn khah

8. Senso zât : ₹ 51, 684. 00

9. Làwmawm lam: Ni 20.11.2017 tlai lam dár 4:54-ah Upa Zonunmawian Pathian hnênah ÷awngñtaiin min hlan a. Zànkhuua kalin a tûk chhùn dár 12:30-ah Horidon kan thleng a, thawktute leh kohhranhóten min lo làwm a. An kohhran Upa Probata inah kan innghat a, zanriah tui tak min lo siamsak a, kan làwm hle. Chanchinbu mi (*journalist*) an kah hlum avàngin *bandh* huaihawt a, kan khawl lamah fel lo a lo awm bawk nèn, ni 22.11.2017 zàn dár 8:00-ah hna kan ÷an thei chauh a ni. Tlaivár ÷haka thawkin a tûk tlai dár 2:30-ah Lalpa kaihhruaiin kan thawk zo ta a ni.

Kan thawh theih loh kárah damlo, ramhuai man (ringlo pawh) kan ÷awngñtai a, in te kan fang kual bawk. An kohhran hi zàn tin (inah te) an la inkhâwm a. A kalten thuchah kan insawi chhâwk a, Pi Zaihmingthangin ÷awng a let ÷hin. Chhuata zampher an phahah kan ÷hu sawp a, *bulb* pakhat an khai a; a thim hlauh chuan *mombati* kutzungñang tiat vèl an chhi mai ÷hin. Lalpa fakín kan zai tui thei hle tho mai.

10. Report ÷ûl dang: Horidon Kohhran hi pahnih an ni a. Biak In hmasa hi a sakna a rei tawh avàngin sak ÷hat a ngai tawh hle. ÷awng kan inhriat tawn loh avàngin thawktuten kan ÷awng an let a, an ÷awng an let bawk a. Mahni hna tlansana min lo buaipuina zawng zawngah Lalpan a khawngaih rawngbâwl hna an thawhna malsâwm rawh se. Tichuan, ni 25.11.2017 zàn dár 10:45-ah Pathian ven leh kaihhruainain kan veng kan thleng leh ta a ni.

R. Chalkhuma, Work Camp Ziaktu

5.

1. Field hming : Home Mission North

2. Khua : Zomuantlang

3. Tlawh hun chhúng: Ni 22-28 November, 2017

4. Tlawhtu : Laipuitlang Kohhran Pavalai Páwl

5. Kal zât : Mipa – 16

6. Tlawh chhan : Hnathawh leh Crusade

7. Hnathawh : Biak In chung, bang, skirting, notice board & sikul ÷hutthleng siam; In tlawh kual

8. Senso zât : ₹ 60,000.00

9. Làwmawm lam: Kohhran mipui kan hlim hle a. Biak In hlui tawh rawng kan hnawih thar hian kohhran mite rilru a tithar a; faina lamah hma an sâwn phah ngei ang.

10. Report tûl dang: Ringthar chhúngkuate awmna tlawh chhuaha, fuiha, tawngtaina hman a ni a; thilpêk pawh (*tlém lua aum lovin*) kan pe bawk. Hêngte hian ringtute rilru a hneh a, inpumkhatna tha a thlen niin kan hria.

C. Lalengmawia, Ramthar Ziaktu

1. **Field hming** : Tripura Mission Field
2. **Khua** : Chapia Kohhran (Burburia Bial)
3. **Tlawh hun chhúng:** Ni 27.11.2017-2.12.2017
4. **Tlawhtu** : Saitual Chhimveng Kohhran
5. **Kal zât** : 8
6. **Tlawh chhan** : Hnathawh
7. **Hnathawh** : Biak In Tûkverh 4 leh Kawngkapui 3 siam leh Vestry sak
8. **Senso zât** : ₹ 51,209.00
9. **Làwmawm lam** : Kan kal denchhen hian kohhran mi Kristian dâna la innei tha lo tuak rukte chu Bialtu Pastor, Rev. C. Lalremsanga kutah an innei tha a. Kohhran Upa *Ordain* lo ni tawh te pawh an tel a, kan thlen tlaiah inneih inkhâwm hi hmangin inneih ruai kan kil ho nghâl a ni.

Kohhranhote an phûr thar hle. October 2016-a Biak In an sak tan khân hnatlang tûr pawh an inhmu tawh mang lo kha ni a. Tûn tûmah hian kohhranhote phûr takin kan hnathawk min lo pui a, an hmél hmuh a nuam hle. Kham lo takin kan hawsan hnuah mi pathumin baptisma an chang thar tih kan dawng.

10. Report tûl dang: Chapia Kohhran hi in riat, member 63 vèl an ni. A khaw pum deuhthaw hian kristian an lo ni tawh a; mahse, an sakhaw hluiah an lêt leh nasa hle. Kristian-te zîngah hian zirna lama hlawhtling tak tak te leh Pathian thu zir te pawh an awm ve a ni. Biak In tshutthleng, kan siam tûra an lo ruahman chu thingphêk an la neih hman loh avângin tshutthleng sawm siamna daih kan leisak. Kan haw dawn tlaiah an rawn thlen chauh avângin kan nawr mamsak a, mistiri rawihna tûr kan pe bawk.

Khuang an neih that loh avângin Biak In khuang tha tak (a lian leh a têt) kan pe a. Work Camp-a kal nân hian

Ramthar Committee-ten khuang kan siam thin a; ₹ 100,000.00 kan target a. Pathianin mal min sawm a, khuang hralhna kan hmuh that avangin kan target bakah Saitual Chhimveng Kohhran atanga indang tur Bethel Kohhran tan thutthleng siamna tur ₹ 30,000.00 leh khuang pali kan la pe thei a ni. Work Camp-a kalten zing dar 6:00 atanga zan dar 10:00 thleng hna kan thawk chung pawhin tu mah insawisel kan awm lo va; Pathian rintlakzia leh belh tlakzia kan hmu Chiang hle.

Ramthar rawngbawlnaah hian kum 2006 atanga kan sum tuakna bulpui ber chu Khuang kaiha hralh hi a ni a. He kan rawngbawlna hi Pathianin mal a sawm a, Zoram pawn lam thleng pawh hian kan thawn chhuak hnem ve hle tawh a, kan lawm khawp mai. Khuang hi la siam zel kan tum a, rawngbawlna atana khuang mamawhtute tan chuan biakpawh theih reng kan ni e.

R. Lalruatkima, Ramthar Ziaktu (8974215276)

6.

1. **Field hming** : Cachar Tlangram Presbytery
2. **Khua** : Birbanga (Manikbond Pastor Bial)
3. **Tlawh hun chhung**: Ni 27.11 -2.12.2017
4. **Tlawhtu** : Lily Veng Kohhran Kohhran Pavalai Pawl
5. **Kal zat** : Mipa -14
6. **Tlawh chhan** : Project tihhlawhtlin nan
7. **Hnathawh** : Missionary Quarters sak.
8. **Senso zat** : ₹ 67,800.00
9. **Lawmawm lam** : Pathian hruaina kan dawng nasa hle mai a, kan thawh tura mi an beiseite pawh kan thawk zo thei a; Work Camp-a kalten nuam kan tiin kan hlawkpui em em a ni. Birbanga/Simluang Kohhranhote nen pawh rawngbawlna hun tha tak mai kan nei thei a, zawngchhang tlak kan ti hle.
10. **Report tul dang**: Birbanga (Simluang) Kohhran Krismas hmanna turin ₹ 4,000.00 Kohhran Pavalai Pawl hmingin kan pe a; kan committee member, Pu T.C. Lalduhawman tui pump-na khawl leina turin ₹ 30,000.00 a pe baw a ni.

Vanlalfaka, Kohhran Pavalai Pawl Ziaktu

† **Kan nun hlui chu Kraws-ah chin ralin a awm a; Thawhleha hian nun thar min pe. - Watchman Nee-a**

SMB RINGTHAR 2018

| Sl. No | Field | January | February | February thleng |
|--------|--------------------|------------|------------|-----------------|
| 1 | Arunachal East | | | 0 |
| 2 | Arunachal North | 14 | 11 | 25 |
| 3 | Arunachal West | 10 | | 10 |
| 4 | Assam | 4 | 1 | 5 |
| 5 | Barak | 4 | 28 | 32 |
| 6 | Delhi | 7 | 8 | 15 |
| 7 | Jharkhand | 27 | 20 | 47 |
| 8 | Karbi Anglong | | | 0 |
| 9 | Home Mission North | 1 | | 1 |
| 10 | Home Mission South | | | 0 |
| 11 | Kolkata | 85 | 115 | 200 |
| 12 | Lucknow | 26 | 44 | 70 |
| 13 | Nepal | | | 0 |
| 14 | Odisha | | 20 | 20 |
| 15 | Patna | 8 | 21 | 29 |
| 16 | Siliguri | 11 | 21 | 32 |
| 17 | Tripura | 99 | 144 | 243 |
| 18 | Masihi Sangati | 123 | 150 | 273 |
| | TOTAL | 419 | 583 | 1002 |



**Tripura Gospel Team
(February, 2018) member-te**

Postal Regn. No MZR/46/2018-2020

RNI Regn. No. 40889/88

Ramthar Hlimthia



"Kraws hmangaihna thu hril zêl hi,
Tûl lo sela, Ka Lal Isu;
Lei hrehawm hi kalsan thuaia,
I hnên thlen ka nghâkhlel."

Tripura Mission Field-a
missionary-ten
Chanchin Jha chi an
feh chhuahpui dawn.



Huseinpur khuuah ringtute leh ringlote an inkhawm.
Khaw sawm vel a'angin mi sawmriat vel an rawn inkhawm. Hma kan
lak tharna hmun ni mah se ringthar pawh mi 10 lai kan nei ve ta.
Lucknow Mission Field

To

If not delivered please return to:
The Manager
Ramthar Chanchinbu
Synod Office, Aizawl, Mizoram,
India. Pin - 796001

Published by Rev. K. Lalrinmawia and Printed at the Synod Press, Aizawl on
behalf of Ramthar Association, Aizawl, Mizoram. Copies- 34,200